



Philip Levy ei in dils emprendists da polimecanist. Primavera fine-scha il giuven igl emprendissadi e sco el ha tradiu resta el vinavon tier la Distec.

Adrian Rohner da Degen ei concentraus, sia lavur ei lavur da perfecziun.

FOTOS S. ROTHMUND



## Jon Domenic Parolini senta il puls dils interprendiders

Il cusseglier guvernativ ha visitau la Distec a Mustér ed udiu cun tgei problems che la firma ha da sbatter

DA SUSI ROTHMUND / ANR

■ La Distec a Mustér ei ina dallas rond 20 interpresas el cantun Grischun che Jon Domenic Parolini – il cusseglier guvernativ e cau dil Departament d'economia publica e fatgs socials dil Grischun – ha visitau dapi ch'el ein entaus en uffeci. Sia viseta dalla gievgia vargada ha il directur dalla Distec, Loris Marsura, nezegiau per presentar l'interpresa e discutir ils problems che fan ils quitaus ils pli gronds. La Distec a Mustér exista dapi 50 onns ed ei tenor il president communal, *Francestg Cajacob* – ch'ei era staus presents a caschun dalla viseta dil cusseglier guvernativ – il pli grond menaschi industrial en Surselva. La Distec dat lavur ad 80 personas e scolescha 18 emprendistas ed emprendists. Sco *Francestg Cajacob*, *Loris Marsura* e *Jon Domenic Parolini* han puntuau ei la Distec ina petga economica impurtanta per la vischnaunca e la regiun. Tenor il cusseglier guvernativ munta ella ina diversificaziun ed ei ina nischa sper l'agricultura, la selvicultura, il turissem e la purschida dalla claustra a Mustér. La strategia dil cantuns seigi da mirar che la populaziun possi viver ellas regiuns e che las firmas seconcentreschen buca tuttas ella regiun da Cuera e contuorn. «Igl ei remarcabel da veser tgei che vegn tut produciu el Grischun, il spért d'interprendiders che biars affarists el Grischun han dat in bien



Eugen Degonda e Loris Marsura muossan a Jon Domenic Parolini (da sen.) in product dalla Distec.

sentiment», ha Jon Domenic Parolini declarau all'Agentura da novitads rumantscha. Visitond differentas fatschentas dil sector industrial ha el survegniu ina buna impressiun da quei che fatschenta ils interprendiders, ei seigi fetg interessant da veser nua ch'ei vesien ils problems. In aspect che biars hagian numnau seigi la problematica d'anflar glied qualificada sin differentes levels e secturs. Il ferm franc svizzer seigi per entgens interprendiders in grond problem. Ad auters fetschi quel denton buca tons quitaus perquei ch'ei erien sepreparai gia

l'empresa ga ch'ei ha dau in rinforzament dil franc svizzer.

### Products da hightec

Tenor Loris Marsura seconcentrescha la Distec oravontut silla produczion da tocca da hightec per la tecnica astronautica e medicinala. In tierz dils products vegn exportaus. «Nus essan buc ina fatschenta che producescha tocca da 0815, quei renda buc», ha il directur dalla Distec declarau ed aschuntau che la concorrenza ell'Europa digl ost ed ell'Asia seigi bia memia gronda e sappi producir per pre-

zis bia pli favoreivels. Per producir tocca da hightec drov'ei personal qualificau e Loris Marsura ha fatg da saver ch'igl ei grev d'engaschar tal en ina interpresa situada en ina regiun periferica. Quitaus fa tenor il directur dalla Distec plinavon il ferm franc svizzer. Ina gronda part dils products che vegnien vendi dalla Distec a firmas en Svizra vegni numnadamein exportada da talas. Sco igl ei vegniu puntuau dad el e dil president communal savess l'interpresa buc exister senza igl engaschi dil possessur dalla Distec, *Rico Hug* dalla RH Holding.

### Liung viadi da scola

La Distec fa grondas stentas culla scolaziun dils emprendists da polimecanist (quater onns) e mecanist da produczion (treis onns). Sco Loris Marsura ha puntuau cuosta la scolaziun d'in emprendist denter 40 000 e 45 000 francs alla Distec e cu ei hagian finiu igl emprendissadi vegni ina gronda part acquirada da firmas ella Bassa. Savens setracti ei da firmas che scoleschen sezzas buc emprendists e carmalien cun pagas pli aultas che quei ch'ei sappien far amogna. In problem ei tenor il directur dalla Distec era la topografia e la distanza tiels centers. Ils emprendists ston ir mintga jamna a scola professiunala e quella ein a Rorschach ni Ziegelbrücke. Per emprendists da sisum la Surselva seigi ei buca pusseivel d'arrivar ad uras el liug cul traffic public. Perquei giavischela ei ina optimaziun dallas colligiaziuns. Sco Jon Domenic Parolini ha declarau sappi il cantun buca midar la topografia. Per ina adattaziun digl urari ha el declarau ch'ei seigi il meglier sche la vischnaunca fetschi la domanda alla istanza responsabla. Il cantun sappi era buca dar sustegn finanziari ad ina firma. Il cantun sappi silpli porscher maun sch'ina interpresa hagi in project zun innovativ. Quei che pertucca la scolaziun ha il cau dil Departament d'economia publica e fatgs socials dil Grischun buca vuliu s'exponer, quei seigi caussa dil departament d'educaziun.

## Concert d'empresa qualidad

Igl Orchester d'acordeon dalla Svizra orientala se presenta a Mustér

DA HANS HUONDER / ANR

■ L'entschatta zercladur da l'auter onn ha la 17avla Fiasta federala d'acordeon liug a Mustér. Per dar in emprendschatg da quei che spetga las audituras ed ils auditurs se presenta igl Orchester d'acordeon dalla Svizra orientala la fin d'october a Mustér. Las preparativas per la fiasta federala marschan. Dils 3 entochen ils 5 da zercladur 2016 vegnan denter 1500 e 2000 musicantas e musicants dall'entira Svizra a separticipar a quei arranschament che vegn organisau dall'Uniun da harmonicas Cadi. Sco quei ch'el president dall'uniun sco era dil comite d'organisasiun, *Flavio Murer*, di, san las formaziuns annunziar lur participaziun dapi l'entschatta october. Temps persuerter han ellas entochen la fin da schaner. Il program da rama per la fiasta ei pli u meins fixaus. Il mument manca sulettamein aunc la part culturala indigena. Per quella part ei il comite d'organisasiun en contact cun differentas uniuns localas e regionalas. Per igl agid avon, duront e suenter la fiasta ein 250 personas dalla regiun sedeclaradas prom-

tas entochen ussa. Rodund 50 spera Flavio Murer ch'ei reusseschi aunc d'animar persuerter. Musicistas e musicists vegnan a prender dimora duront la fin d'jamna dalla fiasta en hotels e menaschis d'alloschi entochen Glion. Tenor Flavio Murer ein ils hotels a Mustér, Medel e Tujetsch pli u meins emplen cun hosps, participontas e participonts dalla fiasta.

### Far gust per la fiasta

En vesta a quei grond arranschament federal l'auter onn se presenta gia uss allas amitgas ed als amitgs dalla musica d'acordeon la pussevliadad d'assister ad in concert. La fin d'october se presenta igl Orchester d'acordeon dalla Svizra orientala numnadamein a Mustér. Igl orchester ei vegniu fundaus 1981 cun la

finamira da sepresentar in onn pli tard alla Fiasta d'acordeon dalla Svizra orientala. Ord quella formaziun ad hoc cun musicists dall'entira Svizra orientala ei la finfinala daventau ina formaziun stabla, pertgei naven dall'entschatta ha ella gudiu gronda simpatia tier il publicum. Gia paucs onns pli tard ei igl orchester separticipaus al Festival d'accor-

deon dalla Alps ad Innsbruck ed ha contonschiu leu il predicat «excellent». La finfinala ei igl orchester ius sin pliras turneas, denter auter atras Chile e China.

### Entira Svizra orientala

La formaziun che vegn dirigida dapi 2013 da *Peter Stricker* dumbra 17 activs. Tschun da quels sunan egl orchester dapi sia fundaziun avon 34 onns. Il program che la formaziun presenta la fin d'october a Mustér ei fetg variants. Per ils organisaturs ei il concert d'impurtonza era per la fiasta federala igl onn vegnent. «Ella Sala Peter Kaiser dalla claustra da Mustér duein ils tocs da pag vegnir presentai. Quei orchester cheu vegn a mussar a nus con buna che l'acustica ei leu», di Flavio Murer. El spera cun biars auditurs a quei concert che vegn a cuzzar rodund 70 minutas. La participaziun al concert digl Orchester regiunal Peter Frey da Reinach avon in onn era stada plitost magra.



Igl Orchester d'acordeon dalla Svizra orientala suna ella pli aulta categoria.

MAD

Il concert ha liug sonda, ils 31 d'october 2015 allas 20.00 ella Sala Peter Kaiser dalla claustra a Mustér. Entrada libra, collecta.